

運糧旗軍不許沿途將米糶賣鄰倉人戶不許

國米糶與上納如違本船把總官軍一體參聞
成化六年七月十六日都察院爲禁約事該提督巡
捕錦衣衛指揮僉事朱騏奏該校尉蔣士能等捉獲
直隸大河衛前所百戶楊佐下運糧旗軍葉官二等
各因免運到湖廣荊州府等衛官糧糙粳米每船正
耗共四百二十石赴京倉上納爲見沿途乾旱米貴
各人要得覓利肥己陸續將前項糧米糶賣共得銀
六十一兩四錢隨身藏帶行至河西務平說牙人李
福等買剝賣米人鄭愷等糙粳米九十七石四斗俱
在燕山石衛舍人吳順家囤放要行上倉致被緝獲
到官審供明白欵將見獲葉官二等逼送法司究問
切詳漕運本以接濟京畿即今四方水旱相仍人民

缺食京城米價比之往時已增一半今又運糧官軍糴買上倉不無愈加騰湧及訪得每歲運糧船隻經過缺米去處官軍有將糧米易換貨物潛到張家灣等處發賣轉糴糧米上納者有將糧米沿途糴賣銀兩來京收糴上納者及在京有等豪橫之徒號名買頭但遇放支官軍月糧不分多寡收買在家因放專一賣與運糧官軍得利肥已米價因而高貴姦頑遂爲得計妨民害事莫此爲甚若不禁革誠恐各處運糧官軍一槩倣效深爲未便乞

勅都察院出榜禁約及行移提督漕運都御史等官并巡河御史設法嚴加巡察若有運糧官軍沿途糴賣糧米者杖便拏問及行在京通州等處管糧巡倉等官通行禁約凡各倉鄰近之家不許收買糧米囤放賣

與運官軍如有此等事發買米官軍并把總各衛所該管官員一体治以重罪通同買米之家亦與同罪如此庶使奸頑之惧而京城米價不致增益等因其本奏奉

聖旨是都察院便出榜嚴加禁約欽此欽遵除將送到犯人葉官三等收問外擬合備榜前去在京并通州等處各該倉場市鎮處所張掛禁約仰各照奏奉

欽依內事理一体遵守敢有運糧官軍似前沿途糴賣原運糧米覓利肥入已却行來京臨倉買米專與運糧官軍抵數上納者許四鄰火甲并巡捕人役指實拿赴巡倉御史并巡捕委官處轉送法司究問治以重罪仍將本衛所把總并該管官員一体參奏拏問施行